

Daj yamq hwnj sam cik gyangjdaiz, gou itcig dang boux banhcujyin ndeu. Daj lajmbanj haeuj ndaw singz sonhag, seizgan nanz le, gou nanz mbouj nanz cungj siengjniemh gij saedcej youq laj-mbanj sonhag haenx.

Geiq ndaej bi 2002 ngamq ma mbanjranz sonhag, gou son sam nienzgaep ban ndeu yijvwnz, caemh dang banhcujyin. Ndaw ban miz 32 boux hagseng, couh miz 24 boux hagseng bohme hwnj youq rog dajgoeng, it bi daengz haemh ngamq ma saek baez song baez, mizmbangj geij bi ngamq dauq baez he. Gyoengq hagseng gig noix ndaej raen bohme hwnj baez he.

Miz boux hagseng iqet ndeu hawj gou gig haeujsim. Daeg hagseng neix heuhguh Vangz Swngh, gyoengqvunz cungj heuh de guh Daegswngh. De ndang byombyetbyet, najnoh hausek, doiq lwgda ndongqliklik. Ceiq yienjda dwg aen gyauej de, gyomq hung byoem youh ndaem, dak ndaej aen ndang de byombetbet, caen dwg lumj gyauej lauxbaeg iq.

Daj seiziq de couh caeuq daxgoeng daxbuz de guhdoi youq, bohme de youq Guengjdoeng guh hong, cij miz ndwencieng songde cij dauqma ranz gvaqcieng. Daegswngh youq ndaw ban najnomj vah youh siuj, bingzseiz gig noix caeuq doengzhag guhcaemz, roengzdangz de couh gag boux ndeu naengh youq henz daizsaw, caemcaem muengh dingj ranz ngaengwdngwd. Mizseiz doengzhag iu de bae guhcaemz, de cungj fan dahau dauj caengz boux dauj iu de, mizseiz lij maenj aen bak bongzbetbet.

Hawj gou haeujsim daengz Daegswngh dwg baez daih'it gaujsi gvaq le, de gauj ndaej mingz daih'it daengx aen nienzgaep. Bingzseiz hwnjdangz sat anbaiz cozyez, Daegswngh cungj guh ndaej cingjingj caezcaez, hoeng, gou mbouj caengz siengj daengz boux lwnyez neix baenzneix roengzrengz doegsaw. Fat gaujgenj roengzbae le, gou heuh Daegswngh caeuq gou naengh laj gofaex henz cauhcangz gangjvah dajging. Hoeng, de daj goek daengz byai cungj dwg ngaemgyaeuj, mbouj ok saek di sing, gou cam de, de hix mbouj ngiengxyaeuj, hix mbouj han gou saek coenz.

Doeklaeng gou gietdingh bae ranz Daegswngh yawjyawj. Ngoenz

haenx dwg ngoenz singhgiz ngeih, banringz cuengqhag le, gou caeuq Daegswngh guhdoi byaij bae ranz de. Daegswngh aemq aen daehsaw byaij baihnaj, seiz mbouj seiz aeu din dik ndaek rin iq gwnz loh, gyauej cungj mbouj baenq dauq yawj gou saek da. Gou seiz mbouj seiz cam Daegswngh song sam coenz, hoeng de lumj mbouj ndaejnyi nei, cungj mbouj han saek coenz, de cij guenj gag byaij gag loh. Cigsoh byaij coh baihsae, yawjraen aen ranz gadog youq gyauej mbanj laj dinbya, seiqhenz cungj baet ndaej seuqsatsat.

Daegswngh byaij gvaqbae dingz roengzdaeuj nyoengx hai faj doubenj, couh cigsoh byaij haeujbae lo. Daihgaiq dingqnyi sing bakdou hai, baihdaw couh cienz daeuj gij sing cauzcwdcwd—duzgaeq ndaw rongz diuq hwnj diuq roengz, hemqguggug; duzbit daj ndaw geh ciengz baizdoi byaij okdaeuj, youq laj roq doq ndoet gaemz raemx doq iet hoz heuhsapsap. Ciepdwk ndaw ranz miz vunz byaij okdaeuj cam: “Byawz ha?” Dingqnyi sing cam, Daegswngh sikhaek cuengq aen daehsaw, cacoemj haeuj ndaw ranz bae. “Daxbuz, daxbuz, dwg gou, gou cuengqhag dauqma lo!” Daegswngh doq haeujbae doq angqvauvau dap naeuz.

Yaep he song buzlan byaij okdaeuj. Raen gou ndwn youq ndaw gyanghongh, daxbuz Daegswngh naj riunyumj dwk cam: “Ei! Mwnz dwg……?” Daxbuz Daegswngh mbouj roxnaj gou, Daegswngh youh ndoj youq baihlaeng daxbuz de najnding dwk mbouj gangjvah. Gou gangj: “Daxbuz Daegswngh mwnz ndei, gou dwg lauxsae Daegswngh, Daegswngh youq hagdangz cingzcik gig ndei, baezneix gou daegdaengq daengz ranz coh gyoengqsou haenh de.”

Daxbuz Daegswngh baez dingq

Dawz Ndit Saj Youq Giz Dieg Dinghrwgrwg

把阳光撒在静静的地方

□ Cinz Lisinh / 覃丽新

gou gangj, gwnz naj de sikhaek riu ndaej lumj dujva seizcin ngamq hailangh nei. Daxbuz Daegswngh gaem fwngz gou couh naengh youq bakdou, doq naengh roengzdaeuj doq caeuq gou gangj: “Seizneix daxgoeng Daegswngh bae ndawnaz guh hong lo. Daeglan gou gig gaenx guh hong, moix ngoenz cuengqhag dauqranz de cungj gag bae gueng gaeq gueng bit, rap raemx cawj haeux, cungj mbouj aeu son de daengq de, de couh gag rox guh caez…… Daxbuz sim soh bak vaiq, daj saeh Daegswngh gangj daengz saeh ndaw ranz, daj saeh ndaw ranz gangj daengz saeh ranznden, gou youq henz lauxsaed dwk dingq, seiz mbouj seiz ngaekgyaeuj.

Gangj daengz bohme Daegswngh, daxbuz Daegswngh mbouj gangj maz, cij daengq Daegswngh aeu laebdaeb roengzrengz doegsaw, daengz ngoenzlaeng ra ndaej gwn guh ndaej bae, bohme de itdingh dauqma caeuq gyoengqde itheij an'an onjonj gvaq saedcej. Gou roxnyinh Daegswngh itcig roxsoq: Youq ranz gaenx guh, youq hagdangz haenqrengz hag, mbouj yungh daxgoeng daxbuz vih de causim saek faen! Gou caeuq daxbuz Daegswngh gangjvah seiz, Daegswngh gueng gaeq le youh gueng bit, rap raemx venj doengj hwnj faexhanz seiz lij coh song dou riuhehe. Haemh haenx gou caeuq daxbuz Daegswngh

gangj daengz mbwn laep cij dauqranz.

Daj seizhaenx hwnj, gou fatyienh Daegswngh lai maij riu, roengzdangz le mbouj caiq lumj gaxgonq lo, de mizseiz lij caeuq doengzhag guhcaemz lune. Miz baez ndeu, gou hwnjdangz cam gyoengq hagseng: “Byawz maij gwn binghgizlinz?” Gou ngamq cam seiz, raen Daegswngh sikhaek ngiengxyaeuj yawj coh gou, cik fwngz sangsang yaengx hwnjdaeuj! Gou couh hawj de ndwn hwnjdaeuj dap aen vwndiz neix. De dap sat, gou raen de riunyumnyum, lumj dujva cingq coh gij ndit ronghsagsag haenqrengz hailangh.

Mizseiz caeuq gyoengq doengz-saeh gangjgoj, miz boux gangj daengz gij lwnyez lajmbanj naj heiz fwngz uq, gwn hoj daenj vaih, gou mbouj gangj dwg gij saeh Daegswngh, cij lwnh gou dingqnaeuz miz boux hagseng baenzlawz gaenx guh hong-ranz caemhcai roengzrengz doegsaw hawj gyoengqde nyi.

Mboujguenj gij saedcej ndaw singz baenzlawz ndei, baenzlawz yinx vunz, gou cungj geiq hwnj gij saedcej doenghbaez youq lajmbanj sonhag. Gou nyienh bienqbaenz gij ndit raeuj, saj youq aen dieg dinghrwgrwg lajmbanj, hawj gyoengq lwnyez lajmbanj ndaej youq laj ndit raeuj maj hung maj sang.



Fwj mok heux bya.

Dizswh

·gojsaeh iq·

Goenglax Coengmingz

老 翁 聪 明

□ Hoz Cunghliuj / 何宗柳

Gaxgonq, miz boux vuengzdaeuj ndeu gag nyinhnaeuz swheij gig coengmingz. Miz ngoenz he, boux vuengzdaeuj neix okbuengj lwnh hawj lwgminz, naeuz danghnaeuz miz byawz rox hawj vuengzdaeuj naeuz gij vah de gangj dwg vah yaeuh, yienghneix bouxvunz neix couh ndaej ciengj daeh gim ndeu. Gyoengqvunz rox le, bouxboux cungj bae sawq, hoeng, cungj mbouj miz byawz ndaej daeh

gim ciengj haenx.

Miz ngoenz he, miz goenglax he bae sawq. De menh byaij haeuj ndaw goengdienh, vuengzdaeuj baez raen de, ndawsim gag ngeix: Boux goenglaux neix laux baenzneix, de haengdingh caeuq gyoengqvunz gaxgonq doxdoengz, doeklaeng song fwngz byouqyangyang dauqbae. Goenglax neix dauj doiq vuengzdaeuj naeuz: “Biya, seizneix mwnz itdingh mbouj

geiq ndaej gou lo. Gaxgonq, mwnz okrog bae youz seiz, yiemq daeh gim ndeu duh gou!”

Vuengzdaeuj baez dingq, doeksaet caez, seizhaenx de mbouj miz maz banhfap lo. Naengh naeuz goenglax neix gangj vah yaeuh, de couh ngaiz hawj goenglax neix daeh gim ndeu; naengh nyinhnaeuz goenglax neix

gangj gij vah dwg caen, de couh wnggai boiz daeh gim he hawj goenglax neix dauq.

Doeklaeng, vuengzdaeuj fouznaih lo, cij ndaej hawj goenglax neix daeh gim ndeu! Gyoengqvunz rox le, cungj haenh boux goenglax neix coengmingz.